

INUIT ATAQATIGIIT

Inatsisartuni



UKA2019/Imm. 11
20. november 2019
Stine Egede

2018-mut Nunatta Karsiata Naatsorsuutaasa akuersissutigineqarnissaannik siunnersuut.

(Aningaasaqarnermut Nunanilu Avannarlerni Suleqatigiinnermut Naalakkersuisoq)

Siullermik kukkunersuisut sulillaarsimanerannut qutsavigissavagut. Minnerunngitsumik ataatsimiititaliami sulinitinni apeqqutinut paasiuminartunik akissuteqartarnerannut.

Inatsisartut Kukkunersiuinnermut Ataatiimiititaliaa ukiut siulii assigalugit assigiinngitsunik itisiliilluni Naalakkersuisunut apeqquteqaateqartarsimavoq, akissutillu ilaat pisariaqartitsineq malillugu itisilertinneqarsimapput. Akissutillu naammaginarsimani oqaatigissavarput.

Inatsisartut Kukkunersiuinnermut Ataatiimiititaliaanut tunngatillugu taasariaqartoq Inuit Ataqatigiinniit Inatsisartunut kaammattuutigerusutarput tassaavoq ataatiimiititaliap atuuffiata ukiunut qinigaaffinnut atuuttussanngortinneqarnissaa kaammattuutigissagatsigu. Ima paasillugu ilaasortat qinigaaffik naallugu paarlaateqattaannginnissaat anguniartariaqartoq. Tamanna iluaqtaaffeqassaaq inuit aalaakkaasumik atanertik aallaavigalugu sulianut iserluarsimanerullutik malinnaalluarnunissaat anguneqassamat. Tamatumalu kingunerissavaa Nunatta Karsiata naatsorsuutaanik nakkutiginnineq sukumiinerusoq.

Tamanna siulittaasoqarfimmut kaammattuutaareernikummat neriuppugut paasilluarneqarluni piviusunngortinneqarumaartoq.

Oqaatigissavarput Nunatta Karsiata Naatsorsuutai 2018-moortut annertuunik kukkuneqaratillu amigaateqanngimmata. Tamanna Inuit Ataqatiinni naammagisimaaratsigu oqaatigissavarput.

Aammattaaq siusinnerusukkat kukkunersuisut kukkunersuereerlutik oqaaseqaatigisimasaat aallaavigalugu kukkunersuukkat angisuut ilaat ataaseq matuneqarpoq, taamaalillunilu maanna ammasut arfineq marlunngorsimalerput.

Taamaattoq erseqqissassavarput nammineerluni nakkutilliinerit suli pitsaanerulersinneqarnissaat pisariaqartoq takussutissaqarmat. Siusinnerusukkulli atuutilersussaagaluq nakkutilliinermi atortussaagaluq tassalu ERP-p 2018-mi atuutilerfissaagaluq ukioq mannamut kinguarsimavoq.

Nunatta Karsiata Naatsorsuutaasa misissornerini nassuiaatini arlaleriaqaluni ERP-p nutaap pisariaqartinneqarnera ersertarpoq. Taamaammatt neriutigaarput siunissami iluaqtaallualerumaartoq.

Kukkunersiuisut oqaaseqaatiminni kingusissukkut naatsorsuutini iluarsisuteqartarnerit amerlavallaarneri ernumanartoqartikkai, kiisalu nakkutilliilluni iliuusaasarsimasunut uppernarsaatit naammattannginerinik oqariartuuteqarnera Inuit Ataqtigiinni taperserlutigu oqaatigissavarput.

Inatsisinut naapertuunnermik kukkunersiainermut tunngatillugu sukaterisoqarnissaannik kukkunersiuisut kaammattuutaat aammattaaq Naalackersuisunut eqqumaffigeqqussavarput.

Ilaatigut aningaasaliissutinut nakkutilliinnermut tunngasuni, pisiniartarnernut tunngasuni minnerunngitsumillu aningaasarsarnermut tunngasuni. Kingullermut tunngatillugu atorfininnermi isumaqtigiissutit utertinneqartarsimannginneri tikkuarneqarput. Sakkortuumik ataatiititaliaq aaqqiisoqarnissaannik kaammattuuteqarmat.

Tunisinernutaaq tunngatillugu Namminersorlutik Oqartussat suliffeqarfiutaat avataani suleqatigisanut kiffartuussinnermik tunisaqartarnermi sulianik sunik tunisaqartarneri erseqqittanngimmata pisariaqarluinnartoq sukaterisoqarnissaa. Akileraartartut aningaasaatai atorineqartillugit erseqqissumik takussutissaqartuartaqarpoq aningaasat sunut atorineqarnerisut.

2018-mi Naalackersuisoqarfinni atorfiit inuttaqanngittut arlaqarsimapput.

Tamanna pingaartumik Isumaginninnermi aqutsisoqarfimmi malugineqarsimavoq. Tassami suliassanik assigiinngitsunik kinguartoorutaasimasoq nalunaarutigineqarpoq. Ilaatigut angajoqqaarsianut tunngaviumik pikkorissartitsisarnerit, angajoqqaarsiat ilinniarteqqinneqartarnerinut kiisalu ilaqtariinnut siunnersuisarnerit tunulliunneqartalersimallutik.

Siunnersortinik avataanit atuineq nungutivissinnaanngikkipput Inuit Ataqtigiinni ilisimavarput.

Taamaattorli akuersaarsinnaanngilarput sulisooreersimasunik suliunnaarnikunilli siunnersortitut atuutsitsisarneq. Tamannalu pingaartumik isumaqtigiissutit atorfeqarnermi atuuttut avaqqutaarniarneqarnerinut atatillugu.

Minnerunngitsumik sulisut pioreersut atorlugit suliassat suliarineqarsinnaatillugit tamanna soorunami qinigassaajuarnissaa pisassasoq kissaatigaarput.

Ilungersunartutut isigisariaqartoq, taasariaqartorlu tassaavoq siunnersortinik atuinermi takussutissiap qangalili neriorsuutigineqartup suli pigineqalinnginnera. Tamanna ilungersortumik Naalackersuisunut kaammattuutigissavarput pilerseqqullugu. Tamannami ammanerusumik paasisutissiinnermik aallaaviliissammat, siunnersortinillu sunut atuinerup ammanerusumik malinnaavigineqarnissaa pilersinneqassammat.

Misissuinerit angisuut arlaqartut 2018-mi naammassineqarsimapput.

Kiffartuussinermut tunngasuni annertusisamik kukknersiueq ataatsimiititaliami suliaritinneqarsimavoq.

Inuit Ataqtigiinni nuannaarutigivarput ingerlatsinermik 2017-imi annertusisamik kukknersiueq pissutigalugu 2019-imit Aningaasannut Inatsimmi ilaasunik angallassinermut tapiissutit pillugit isumaqtigiissutinik nutaanik akuersiniartarnek allanngortinneqarmat.

Aningaasanut inatsimmi oqaasertaliussat allanngortinnerisigut naalakkersuinikkut pisarialimmik sunneeqataanissaq qulakkeerneqarpoq.

Inuit Ataqtigiinni biilnut orsersortarnermut tunngasoq suliaq naammassisutut isigaarput aammalu tusaatissatut tigullugu.

Inuit Ataqtigiinni kaammattuutigeqqissavarput imartatta kisimi isumalluutigineqannginnissaanik suliniartuarnissarput. Nunami suliffiit amerlisartuartaqarparput, suliassanullu sulisinnaasunngorsaaneq pimoorullugu inerisartuartaqarparput. Sulineq kajungernartuusoq inuiaqtigiinnullu pitsaasuusoq kinguaatsinnut takutittuartaqarparput.